

[Augsburg], 29. Dezember 1555

An Caspar von Niedbruck

ÖNB Wien, Cod. 9737ⁱ, fol. 144r.

S. P. D. Aethiopicam historiam, Clariss[ime] vir, Domine obseruande, nos habere ignorauimus, ac tum demum cognouimus, cum exemplum aliunde missum cum nostro codice contulissemus, qui quidem Barlaamus inscribitur, seu narratio Indica ad sanctam vrbem translata, nomine autoris qui est Ioannes Monachus Sinaita, ita scripto, vt quid breues illae nota sibi vellent, prorsus ignorarem. Itaque Excellentiae tuae frustra molestus fuit dominus, cui quin voluntas tua gratissima sit, minimè dubito, qui a me appellatus, quid rescribendum esset, se ipsum tibi responsurum esse dixit. Acta Nicenae synodi bis habemus, sed coniuncta cum alijs operibus, quae ratio etiam aliorum quorundam libellorum est, ut alijs communicari aut commutari commodè et citra ornatiss[imorum] codicum deformationem non possint. Hispanum χαριεντίζεσθαι arbitror. Burtenbachius hodie se D. Henzelio libros a te selectos traditurum dixit, etsi a Birckmanno nihil adhuc in mandatis habeat. Si quid erit in quo E. T.^{ae} inseruire possit mea tenuitas, sedulò faciam. De studijs autem, homo a studijs penè alienus, et nescio quibus nugis occupatus, multa verba facere non possum. Vale 4 Cal[endas] Ianuarij. Anno 1555.

E. T.
obseruantissimus
Hiero[nymus] Wolfius.